


ImSan den proceso pa haya acreditacion internacional



ORANJESTAD (AAN):

Siendo un instituto medico cu ta traha duro tur dia pa por surpasa expectativa di su pashentnan, ImSan ta sigui desaroya pa por logra traha a base di normanan internacional. Recientemente Gregory Croeze, director financiero di Instituto Medico San Nicolas, ImSan, a participa na e "Annual National Institute of Health Financial Management Association" (HFMA) na Las Vegas, Nevada. E aña aki e tema tabata "This is BIG: Leading the Change".

HFMA ta un asociacion cu ta conta cu mas di 40,000 miembro. E ta e organizacion mas grandi pa loke ta trata lidernan financiero den e sector di salubridad. Oradornan principal cu a duna un presentacion durante e conferencia aki tabata Daniel Pink, Atul Gawande y Liz

Wiseman.

Den e industria di salubridad como tambe financiero tin hopi reto y hopi cambio ta tumando luga den e ultimo aña nan. "Ta bon pa keda na altura di tur locual ta pasando pafu di Aruba", asina Gregory Croeze a comenta. El a intercambia di idea cu diferente compania y ehecutivonan. Tambe a tende di tur e retonan cu nan ta pasando aden pa asina por anticipa cambionan na caminda, no solamente den e gastonan di salubridad pero tambe e calidad di servicio cu e pashent ta spera di ricibi.

"Den e ultimo temponan ImSan ta druk bezig pa asina mehora e servicionan pa asina por wordo acredita internacionalmente", Gregory Croeze a enfatisa. "Nos ta den e trayecto pa adkiri e JCI accreditation, cu ta pone nos analisa tur proceso for di un punto di bista di e pashent".

Asina calidad ta bay man den man cu e cuido cu ImSan ta ofrece e comunidad Arubano. Instituto Medico San Nicolas, ImSan, ta existi desde aña 2005, pero na aña 2008 a conta cu henter un renobacion y ampliacion cu a costa 24 miyon florin. E ampliacion y renobacion te ainda no ta cla. E instituto desde e tempo ey ta ofrece servicio di "Spoed eisende hulp", Ambulance, Radiologia, Oftalmologia, Centro Diabetico, Dokter di cas, "Huisarts in opleiding", Laboratorio, Wondenpoli, Trainingorganisatie y recientemente hasta a bira mas conoci ainda pa su servicio di dialyse.

Actualmente ImSan ta atende como 60 mil pashent pa aña, specialmente den su departamento di "Spoed eisende hulp", cu ta habri 24 ora pa dia y ta conta cu un personal atento di 1 internista specialisa, 5 poortarts y 12 nurse. En total 159 persona ta traha na ImSan pa por sirbi e clientenan debidamente.

Na aña 2012 a cera un acuerdo di cooperacion cu Baptist Health y ta e intencion pa pronto cuminsa ofrece servicio di Oncologia.